

皇清文穎續編

皇清文頴續編卷首十三

高宗純皇帝聖製詩

五言古詩

春曉

庭柯鳴曙禽窗櫺散晨景晏眠夙所戒平旦氣方靜  
春衣暫倚楹花乳欣澆茗停蹕匪豫遊勤政同宮省  
借問奏書囊幾多待批省

西海名之曰昆明湖而紀以詩

西海受水地歲久頗泥淤疏濬命將作內帑出餘儲  
乘冬農務暇受值利貧夫歲事未兩月居然肖具區  
春禽於以翔夏潦於以瀟昨從淀池來水圍徵澤虞  
此誠近而便可習欻飛徒師古有前聞錫命昆明湖

學圃

宣聖鄙學圃曾以戒昔賢而我以名亭其義何取焉  
園中景宜備藝桑兼治田於茲課陰晴常切祈豐年  
坦旱得數畝左右夾碧川松竹何必多榆柳徒相鮮

爰命種菓樹行看嘉實駢成此十年計況復灌漑便  
郭橐有名論惟以順木天絜矩爲政方夷考神農篇  
漾舟時經過幽風圖乃全

詠規矩

爲圓必以規爲方斯以矩器殊用亦異此語聞之古  
何人始巧就一物兩用可<sup>叶</sup>直引曲轉旋方圓隨意  
所適便良有餘示義實無取穆命戒便辟聖傳歸質  
魯柄鑿縱不入惡此機變侶或云傳西洋化外奚足

數

觀魚

觀魚偶會心屬詠識窮理水濶育鱗多善惡無不有

一

叶解善爲鯉與鱗惡爲鱣與鮎一般皆水族黑白從

可覘

二解

鮎鱣好食魚鯉鱗不知避潛躍一湖中適以

飼惡類

三解

惡類性戕賊亦知護其子曝鬐當日午他

魚不敢邇

四解

臨流坐石磯飼魚投剩飯噉啁紛齊來

品格誰能辨

五解

善類自柔弱惡類多強梁奪據飽其

腹掉尾而倡佯

六解

見此意不平擲石未卽中本擬鋤

其惡翻驚善者衆

七解

持網伺再來鯨鯉旋復至維彼

鯉與鮎狡警乃遠去

叶八解

物態幻難窮卽小可喻大

惠而不通方幾何不爲害

九解

喜雨詩

五月二十四日

晴久盼雲生生矣愁散却旣陰盼雨零零矣愁勢弱  
勢壯冀時長巡檐自卜度片刻轉千慮憂心信如灼  
誰能沃此心惟賴甘漿酌颯灑初入夜沛然忽大作

列缺鞭川后飛廉悔其惡傾盆解地甲倒井瀉天壑  
森沉達明旦醞釀匝磅礴醫病更滌煩人予安心藥  
大田一以蘇予將望秋獲不雨愁實亟雨足得無樂  
而復恐樂極朝夕增惕若求言斬實益細故紛糾權  
圖政期實濟小補多遺畧豈如旋轉力好生仰橐籥  
一濡萬事和詎予能調幕歲有喜雨詩足知予德薄

招隱詩

昔人此作欲招隱者而去予是什欲招隱者而

來且以崇實去文亦可謂之反招隱而非同康

琚寓意云爾

招隱有成例東帛蒲輪徵其實多難副欲隱乃炫名  
吁嘻更甚者復以充隱稱世變風愈下矯託非人情  
所以安車求不聞在虞廷股肱佐元首喜起歌載賡  
我欲闢四門天衢坦蕩平拒人曷其可曲已有不能  
庶幾兩不失冀得真俊英錯薪之子思肥遯幽人貞  
富貴圖誠小致澤量應宏待賈韞匱答未難荷蕢征



苟其有耽心朝野何殊程

移竹

三庚好移竹千竿輦修玉過雨潤到心延風清滿目  
疎稱倚窗前密合圍水曲時矮近高阜列長傍低澳  
位置各有宜片時盡得之量材以官人曷其異於斯  
竹易人則難吁嗟乎吾思

和杜甫遣興五首

首句皆仍其舊而意自別

天用莫如龍用吉見无首變化故莫測神功在不受

憑雲乃自爲攫鱗亦何有豫且得制之是宜慎所守  
地用莫如馬水行不如舟物各有所長乖宜失良謀  
而況鮮伯樂鹽車老死休舉肥肉脹羣常裝金絡頭  
陶潛避俗翁避俗亦避世柴桑樂無悶自著桃源記  
肩輿命二子偶顧亦何害叶杜陵忠厚人箇翁乃深  
刺

賀公雅吳語老大故鄉迴兒童不相識問客何處來  
可以喻宦況浮雲何係哉山陰泉石佳濁醪常滿杯

吾憐孟浩然蓋亦一作者君固未已棄已則覺君舍  
浩蕩襄漢間曲高和者寡幸有同心人清辭譽風雅

望晴

喜晴纔六日愁霖復連朝憶昨從香山夾路看良苗  
便雨未爲害況復滋新蕎云何腸展轉不解予煩焦  
所慮在永定漫隄築未牢此時不放晴盛漲何時消  
哀哉固邑民風雨所漂搖賑卹詔屢頒補救心頻勞  
萬戶苟失安九重豈足驕晚來西北風浮雲碎欲飄

簷喜乾鵲鳴池斂官蛙囂宜暘願及時南望心神翹

尙書蔣溥奏進所刻御製詩集書此誌懷

伊余有結習對時耽屬詠賦詩何必多杜老言誠正  
況乎居九五所貴行實政享帝虞舛缺綜錄予所命  
自丙辰迄丁卯所作詩已積有四千餘  
首上年曾命翰林中書等分卷繕寫  
殺青匪素志

旣成姑亦聽哀然宛成帙十二年言行其間憫農切  
今昔頗可證治未臻唐虞志徒希賢聖他年諷茲什  
慙否復難定

過潞河

潞河潦雖退平川水猶漲以此例永定狂瀾詎能障  
黍莖帶沙痕結穗欠豐壯景異向所觀憑輿增悒悒  
頗有爲解者云此河灘上本爲水由處人不與相讓  
於茲得免潦高田恐無當我聞吁益輦何莫非吾民  
使人有餘地孰與水爭利高下皆獲收吾願其少酬

讀書

巡狩不廢學書史常相隨踣值清暇不厭往復披

腹笥我何有汲古堪消時詎惟詞藻貴亦云言行資  
內聖及外王大要豈外茲返已多抱慙空慙徒爾爲  
九日幸旺泉導醴亭登高

東垣古名郡沃野耕桑稠汎泉隨處溢水利良足修  
斯泉獨名旺久藉溉田疇歲遠惜湮廢疏濬法宜求  
高斌建鉞時承命相視周淤者剔其源塞者鬢其流  
至今宛成渠餘潤資耕耰爲亭其旁阜曠朗暢遠眸  
名之曰導醴意取醇飲投今日是何日古制登高邱

適值駐翠蹕於焉詠來游曉陰忽開霽少皞行金秋  
拾級扶朱欄濯清俯綠洲黃華纔綻蕊霜遲露顆浮  
但得有菊意佳品何須按暢眺謝龍沙走筆懷滕樓  
來來汝大吏供帳勿華優苟爲事虛文負芻譏反裘  
農功願允愜佳節景并酬故事高商飈權城佳話留

閱滹沱河隄工

有序

滹沱河本無隄以其流漸逼城高斌總督時奏  
建葑壩禦水非如永定兩岸長隄束之行也十

一年閱視時有兜灣吸流處畧經指示建壩挑  
水今已淤沙可耕而河流遂向南徙矣兵民建  
坊頌德夫河流無定南北亦其常耳固安亦吾  
民今夏隄乃潰決豈朕厚於此而薄於彼耶旣  
以成詩並示直隸諸大吏

前歲視漚沱近隄虞侵城今歲視漚沱隄腳淤沙平  
臨流施網處秋麥芄新耕復見好消息中泓向南經  
北隄免衝齧萬戶慶居寧建坊舊駐所感德由至誠



惟予自忖度轉覺愧慙生一時偶指示詎有安瀾能  
設能迴狂瀾永定相視會夏霖乃潰決迄今隄未成  
是河亦渾流來往歲每更所幸有餘地不與水相爭  
長隄護城止曾匪束之行居功而諉過中人以下情  
我常惡彼爲何須揚頌聲

豐樂鎮

一橋接兩隄兩省限一水迎者旣紛來送者亦旋止  
守臣有爾我予心何彼此周障寰海內孰非我赤子

中州乃初至按轡咨民事叶夾道老幼填瞻就近尺  
尺蠲租早頒詔賜金每問齒笑譁奚必禁奔走紛未  
已其數無慮萬一一色含喜嗟予有何德子來乃爾  
爾寒所衣者布飢所食者米比戶日所需直貴固其  
理既庶而既富曰教思所以擾之愛亦害循之順匪  
弛是處名豐樂高廩慶亦有叶顧名心倍欣熙世無  
過是伊洛周鄭間結攬從茲始

南城

道旁古南城城廢存土阜云宋拒契丹築此夾河守

和金計滅遼唇齒患互受外夷尙知此

謂高麗對宋史言

小

利目前取詎惟失河北汴亦不能有國勢成積弱況

復政多咎方士及權姦豈堪僂指數

叶

虛內乃貪外

屋豐閭家蔀五國固其宜炯戒傳不朽

齋居讀書效白居易體

志在魯論語行在虞典謨觀理上下易游情三百詩

叶

苟能體諸躬四種蘊無餘但侈資博覽五車亦云

徒新年景和韶法宮此齋居政務值多暇吾還讀吾  
書讀書如是諒豈同章句儒

免江南積欠二百七十萬及浙江本年正供三  
十萬兩省在京臣工具摺謝恩詩以示之

御宇十六年敬勤盟宥密日久虞或懈觸事勵無逸  
祇此保赤懷自信始終一際和賴

天庥宜與民休息正供三百萬概免施恩恤念茲江  
浙地財賦之所出豈能無水旱曾未靳賑卹閭閻象

如何觀民將啟蹕正逢大慶歲

慈寧開六表兩江積運多蠲除惟一律浙省歲額完  
足占民俗質示嘉量寬徵庶免追呼疾百工佐予者  
寰海籌寧謐爾雖懷桑梓予惟責名實但期一德同  
言謝均奚必在易有至訓惠勿問元吉

河問道中示直隸官

河間古瀛州文物頗可觀前巡適災餘室家纔苟完  
版築命代賑雉堞儼崇垣間閭亦較盛敢非騰炊烟

邇來幸屢熟繭泉粗免寒覽此心爲慰申命親民官  
彼獻乃列藩詩書教尙敦熙朝際富庶教之勿畏難  
束濕術宜戒粉飾習並蠲豈弟行以誠感民亦匪艱  
佇待比戶封吾將鼓薰絃

詠史

范叔因王稽奔秦號張祿使舍食草具歲餘未見錄  
言外觀俯仰稍以中其欲旣信乃言深言行穰侯逐  
拜相受土封顯榮快衷曲微服給須賈莖豆明示辱

一飯德旣報睚眦怨亦復鄭安平云叛河東守乃戮  
臨朝歎昭王辯計兩窘束蔡澤聞之來志匪同庸碌  
持梁刺齒肥四十三年足雄談悟應侯知止全身福  
罷相遂代之數月退何速二子蹟畧同因時互傾覆  
鄙哉勢利徒明鑒昭往贖

甘露寺和蘇軾韻

江曉風始息山芳春未闌江山有佳致助我尋清歡  
三詔別隱士萬騎擁材官捨舟而遵陸快控青驄鞍

左右綠麥畦曲折朱木欄比日多舟居乘馬意爲寬  
南仰峯律摧北俯波渺漫尋筏步初地叅旛標刹竿  
湧出宇寫蓮蹲來石貌獮蒲牢傳天監年月精鐫鑽  
其西踞算峯卧龍籌阿瞞其東接象嶺鎖鑰壯雄觀  
六朝此割據訓練列卒團蕭梁更佞佛云益功德闌  
長廊扶嚙業拾級暫遊盤居然得所思古殿猶善完  
猊鼎噴都梁鯨旛剪綺紈莊嚴獲福果俗僧多誕謾  
天人下山節雲中翔且跚忽爲驂者龍忽爲翥者鸞



如夢幻泡影一語真不刊小閣冠峯頂拂拂天風寒  
長烟一空碧騁日窮江千衛公柏何在空傳枝屈蟠  
更聞葬舍利七粒已出棺當時頗樹黨布金徒致歎  
地下遇董狐應悔跡未刈東坡詩中仙五字留吟安  
豪氣驅雄才力敵扶搖搏倚韻成長篇非欲爲其難  
梅花率已發梅子何時酸重來應首夏無何一指彈

虎邱寺和蘇軾韻

曾聞沈恭子論詩虎邱嶺商周二千年逸事談井井

平原爲磨崖光怪龍蛇耿雙絕尋無蹤累句紛鼃鼃  
汲古得蘇詩兼金固在礦硬語出橫盤有似魚腸猛  
當年圖伯人志氣頗馳騁倏爾埋湏池囑子徒淒哽  
不及槃郢氣化石彈指頃行春喜初地不礙東風冷  
天水目與暢琴書興以永歸騎循蘭蹊江城入雨景  
何當岩半閣坐弄新蟾影去留隨所適奚用山僧請  
紫陽書院題句

沈德潛主紫陽書院爲乞額因顏之曰白鹿遺

規并成是什

械樸重育賢菁莪厘卽俊矧茲文雅都造士方應慎  
書院號紫陽義蓋由慕藺德潛縱懸車鄉教猶能振  
乞我四字額更無他語訓白鹿有芳規氣貴消鄙吝  
學非養貧地貧乃士之分學復不重華華乃實之繫  
功或虧一簣山弗成九仞詩雖夙所耽不足示後進  
努力崇實修佐我休明運

鷓鴣

鷓鴣本野鳥食魚以自活一被魚師得鍛羽如受刑  
以繩縛其頸驅之捕鱸鰕將謂得果腹豈知不下咽  
冥然猶不悟長此安能脫鷓鴣爾特愚漁師爾特點  
格物可會心海鷗信明達

### 洪澤湖

具區昨遙望滸汗含咸池洪澤茲重臨瀕洞撼地維  
尾閭有籌畫駕言親閱之西瞻天無際南睇山一絲  
蘋末息微風濤聲萬馬馳須臾排雪山拍岸還慘澹

漁舟及賈舶出沒銀雲堆觀者爲膽寒爾乃忘其危  
熱中名利人吁嘻可以思

閱高堰壩示河臣

建隄以衛民民安賴隄利設仍民受災隄存亦何濟  
洪湖實巨浸高堰爲障蔽猶虞盛漲時莫禦汪洋勢  
三壩建尾閭節宣原有制何人倡邪說強與安名字  
云開天然壩每歲成故事吸川所不恤滂口所不計  
惟保石隄固河臣能事畢叶以此云稱職夫誰不能

逮高斌覺此非力排向浮議戒以隣爲壑下河實受  
惠但尙虞意外添壩請予示予謂三已多沉五可輕  
試是與開天然實同名畧異因與定恒規率視昨歲  
例仍舊貫者三更新爲者二三猶漲不減許可及次  
第下河數縣民庶免饑溺累昨過清江浦名宦隄旁  
祀皆昔保隄人對民能弗愧

讀宋史

則平輔藝祖創業定九州闔戶讀論語臨政決如流

惟是持綱要不以枝葉求廳中置大甕簿書一以投  
滿卽焚通衢無稽時爲去聲休後來孰稱賢太初平陽  
儔水旱常入告幾先見事周然於陳利害報罷多無  
留二公豈拒言惡人攻已尤仗馬喻百官千載徒貽  
羞伊尹志有無毫釐千里殊叶君相更異勢達聰通  
言收用中有權衡概絕非良謀

建蘭

建蘭來閩嶠國香笑等倫葉攢蒲劍青花噴沉檀芬

每當冀北夏恰報甌南春玉堂以爲居朱草以爲鄰  
深山大澤間寧無紉佩人

萬壽山新齋成

濟運疏名泉延

壽創刹宇山水增斯輝禽魚得其所據勝聊築構軒  
齋儼就矩北戶延螺峯南榮俯璇渚罷臺漸漢文卑  
宮法夏禹

壁戎錦繡帷堂施翰墨筵探蹟披書林契妙忘魚筌



近挹岫出雲遠睇波含烟恭已凜無逸殷心祝有年

讀史效白居易體

貞觀出宮女當時傳美政一日放三千怨曠各遂性  
詎是盡遣去掖庭乏承應料祇減其半率已銜恩慶  
六千其居常三千其僅贖不知大官庖日膳何以供  
叶而今合三宮五百備使令美政不能法後世論姑

聽

牙簞

玉架鶴不慕珠籠鴻反驚珠玉信珍美鶴鴻胡見輕  
物各貴其宜用得當爲榮葛簟以涼薦牙簟以貴稱  
巧匠縷象齒編織成桃笙底慮焚以賄欲擬涼如冰  
長短量牀裁妥帖敷席平維組爲之純照耀四座明  
聲價有足誇美觀亦奚憑握捫縱密緻善刺骨性恒  
絺綌沉薄脆鍼氈坐豈寧燕息姑舍是湘紋安且清  
惟取適用實匪慕崇儉名

飮魚

賦芋較三四喜怒在目前而魚旣非狃且在深淵間  
喜怒豈形色飢飽誰與傳子產亦智者欺方被校人  
上林例孳育澄池富錦鱗守者日竊饋欺魚不能言  
魚亦不復來楚響反遁焉因之試親飮投饕惟淪漣  
一再餌之熟喁喁羣爭先可知非剋滅錦鱗胡潛淵  
謂魚不能恕其理信未然

山田

山田日以闢刀耕火種之所幸常有秋不辭辛苦治

生齒日滋繁地利詎有遺贏此邊外墾稍救乏業黎  
丁男相踵至燕雲逮晉齊奚啻千萬戶梯巖事耕犁  
內外久一家蒙古頗相資更慮啟忿爭治之良有司  
亦知非遠圖權以醫燃眉

於木蘭作

天文漏分野地志闕開縣博覽山海經荒畧一二見  
上林牟內地木蘭關塞甸中外久一家敬奉金甌奠  
單于讓牧場朝家置靈囿深戎武備弛於焉習獮狩

崇岡旣壇曼叢樾亦美茂以故百物滋取豐留尙富  
霜華霏漠宇窪稜紺絳斑蒙茸紫獺裘八月披曉寒  
呦鹿隨哨至樂此誠忘餐樂亦不可極於古戒遊盤  
吳越近經巡山水信清美饒復藉人工未足云觀止  
隱現固有時美善盡無比獨待表章人一爲宣其理  
宣理理乃昧紛然起毀譽不及無名稱故吾猶古初  
劉羸今何有守禦長城隅長城更以外時來習三驅  
繡壁琳瑯標樂洞笙簧幽眇聽欣不凡發思凌清秋

青山生白雲雲去山還留寄此片時興萬劫高峯頭  
觸緒偶卽景得句恒因心申命鄒枚侶染翰賡予吟  
清詞出衆表妙理入細斟寧無不盡意秘藁貽知音  
帳殿張雁塞毳服蒙龍光嘉賓式燕喜乳酒湘黃羊  
錫爵洽衆歡湛露流霞觴戎旨非所知古俗猶敦龐  
楓葉續疊峻楊絲鎖曲隩動靜無窮觀智仁有餘樂  
佳景四時宜最宜乃金昊曷其可久耽言旋勤政要

駿馬

駿馬多意氣不與凡馬儕  
駁娑避塵壒行空越崔嵬  
夜玉裝羈勒秋金飾鞍臺  
伯樂不常有誰識絕倫材  
執鞭非其人駒跳去不迴

命加賑浙省去歲被災州縣詩以示意

兩浙去歲災東較西爲甚嗟嗟我黎民啼飢缺餐飣

石粉聊充餓因以致病瘵

金衢山中有石可爲粉飢民有礪以充食而致病者

疾苦欲盡知終夜不安枕救災無奇方屢留太倉粟  
晚秋縱稍獲哺啜僅餘瀋青黃不接時艱食行哀詵

申命地方吏吾意其悉審食爾無安肉衣爾無安錦  
爲民之父母曰惟爾及朕子餓父則飽於心其奚忍  
叶賑濟期雖溢更發我倉廩博施慎無遺庶蘇彼憊  
憊梗概示端倪施行尙慙憊人力惟小補仰望早稻  
稔

雜詠

天下非常事可一不可再做之善已差不善翻致敗  
如彼西施蠶效益增醜態真宗封劉氏所累君德大



李沆焚手詔不計已利害臣沆爲不可老臣實忠愛  
意直詞則婉君子其言藹神宗勅吏部久任示規誡  
因納御史言撫鎮數進退責成戒紛易政要庸何礙  
而胡王家屏封還博佳話黨同庇其私謬謂國體賴  
柔懦權下移國體益大壞明不旋踵亡其忠乃安在

卽事

轉漕來南方以詔卿士祿詎止贍仕者流通逮比屋  
太倉陳相因因緣竊饋伏昨歲兼偏災致湧屢聞穀

爰貸兩年精連延出困鹿一以清倉儲一以平市鬻  
詔下纔數日歉歲如大熟米價日以賤窮民樂鼓腹  
黠者變其言謂須籌盈縮目前雖暫快明年貴仍速  
況此奸僧計將盡糴官粟賤糴復貴糴三倍飽其欲  
官曹俸緒入家室賴以育今賣鮮利息後買艱升斛  
是謂恩支米官禍商之福我聞爲長吁疇咨當手束  
憤懣無良方孟子昔誦讀每人而悅之惟日亦不足

四帝詩 有序

創業守成之難易予論之已詳古所稱守成令  
辟若夏后氏啟殷太甲三宗越有周成康尙矣  
漢唐而下得四帝焉曰漢文帝曰唐太宗曰宋  
仁宗曰金世宗夫天生民而立之君凡以爲民  
也帝典首以安民爲言周公陳無逸咸知小民  
之依而子輿氏謂保民而王四帝之爲治不同  
要以恭儉爲心行仁爲本庶所謂保民如赤子  
者歟幾餘覽古輒有微斯人其誰與歸之慕爰

用顏延年五君詠例各綴五言一章非惟論世  
實以寫懷史評苛核槩無取焉

漢文帝

周綱旣陵夷變雅民勞瘁高祖易秦暴救世於水火  
休息乃未遑呂雉繼構禍大橫爲天王啟光克負荷  
愛民勵始終約已戒奢侈漢家四百年謂帝所造可  
或議維黃老責賢何瑱瑱

唐太宗

創守一人備無過唐太宗所遭值天倫命也難強同  
英識早絕羣降志牧謙沖有諫無不嘉廣闢四門聰  
行仁有明效德彝惜未逢斗米纔三錢使我希休風

宋仁宗

北宋凡九帝仁宗誠首出繼統忌更張惟帝守以一  
休惕凜天變恭儉以身率吏治若媮惰亦不任法律  
嬖倖或間用善類氣不窒史贊乃最當論世知其實

金世宗

海陵失其德惟帝天所歸時雨滌炎氛一反海陵爲  
南北講和好與民休息之福已兼福人宇內致雍熙  
世稱小堯舜可爲後世師

喻言

物以少爲貴亦以貴招議白石與白玉未始非一類  
石以爲杵白玉以爲彝器人情每視石泛泛無他計  
於玉乃不然睨視求瑕備以此例其凡吁哉可知畏  
馬似鹿千金而無千金鹿馬性取其良鹿足取其速

馬也鹿其性長跳去不復鹿也馬其足林中無一育  
礚礚以攻玉玉成棄礚礚範模以陶磁磁就置範模  
問學與政事况更非兩途何因政勞勩云致學荒疎  
誰能不忘本是謂賢者徒

數詩擬鮑明遠體

一心奚所託爲君止於仁二典傳

家法敬

天及勤民三無凜然奉大公何私親四序協時月熙

績在撫辰五事惟敬用其要以備身六府賴修治平聲  
其施均養人七情時省察懼爲私欲淪八珍有弗甘  
念彼飢餓倫九歌揚政要鄭衛漫亟陳十聯書屏展  
式聽師保諄

雜詩

水至清無魚人至察無徒無魚非水德無徒勢云孤  
魚豈離於水潛淵轉江湖人豈離於世適將他有圖  
知一貴知二通變乃達常不逆復不億抑亦先覺良



吹竽三百人隱笑齊宣王

詩譯

是詩必是詩謂之工刻舟是詩非是詩謂之尙謬悠

君看三百篇一言可蔽不蘇李道義氣淵明樂隱幽

庾謝出清新詎脫風人流三唐多作家巨擘屈指周

信哉李之放豈如杜之愁四朝

宋金元明

間有人起衰末

易求昌黎嘗論文氣水言物浮於詩豈不然奚在藻

續修似淡味彌永外樸中乃腴

叶

譯旨爲五言同人

一咨諏

讀蕭望之傳

東海有鉅儒治經修素履露索不肯聽抱關爲祿仕  
宣廟嚮聞名對策稱進止一歲乃三遷何以酬知已  
雅意在本朝平原辭刺史馮翊復移病諭意事方視  
雖曰不要君其孰信乎此義利抗明辨而胡自擅使  
大閑固未踰小節詎盡美恭顯方枘政薰蕕無合理  
子攸上書訟適用速讒毀浸潤災无妄延緣禍自取

叶  
慷慨飲藥終足以厲懦鄙一再猶不知渭陵實暗  
矣

詠史

戰國多說客秦漢風尙存茅焦感始皇鄒陽悟長君  
知心以說當秘訣韓吃論觸警悅燕媼或嘉納牖言  
苟其盡忠款詎在口給便帝堯斥嚚訟視子共驩倫  
截漕詩 有序

國家歲轉漕東南天庾賴焉遇偏裨或特恩卽

其地截漕糴賑之非需賑未有以截漕爲言者  
比民間米價日貴雖稔秋因採買輒益昂爰勅  
截留楚浙西江漕米各若干以補常平蓋今太  
倉充羨間行之亦酌盈劑虛之道耳恐司牧者  
未喻作詩示之

截漕濟災區初偶今成例匪災仍截漕自我排衆議  
持籌慎所思論亦經遠計獨是秋稔處官糴輒翔貴  
陳陳致紅朽孰與資博濟以此足常平市價自平易

德流則何有效頗速郵置湖南報有收江右稱乃積  
三省聽流通天下可無事補救殫我心豐亨賴

天賜京庾實本根儲蓄貴有備申命方伯臣惠不可  
常誠

讀翟方進傳

孤童恥小史攜母旅京師努力績經學名節頗自持  
謙牧讓胡常藉甚名譽馳効免兩司隸風厲人共知  
胡乃右丞相託言漢舊儀御坐爲起立在輿爲下之

太陽下同物仰照真乖宜薛宣誠掾史豈得謂無私  
其後果代宣公絜弗苟爲求指濟深文好勝勇遂非  
疾惡固云直修怨寧匪巖長辜猶隱諱星變遂戚貽  
白馬賜上尊啜泣亦已遲反復鴻隙岐童謠翟子威  
書通鑑續編宋主答徐鉉事

藝祖志一統命師伐江南卑辭徐鉉來稱如事父嚴  
父子而兩家不可何待占緩師復遣求論辨徒詹詹  
榻側難容唾按劍叱何慙嫚罵如沛公創業多直談

更能用曹彬禁暴恢海涵一時王業定太平引養恬  
時泰作廣義吹求致苛纖謂徐鉉辱君諛頌失太謙  
更爲設若詞包茅問貢拈濶論各有無詭辨逞咕誦  
有如愛二毛宋師無救殲辭費申臆見史義何曾探  
昌黎有定評責人詳已廉

題韓滉田家風俗圖用舊題者韻

灌溉

綠苗秀欲齊穡事忙村莊時澤旣未霑翻車引野塘

炙背相勤劬誰趁午陰涼四民惟農苦嗇矣豪富郎

收刈

穎粟有次第三時序匪卒奄觀逮銍艾豈復辭僂折  
既以完官租亦將贖私褐贖褐云胡爲聊藉禦冬月

登場

宛然觀高廩不諱豐年優多黍復多稌西陌將束疇  
餘三防後歲具四播今秋孰謂農有暇請看食未浮

持穗



顆粒附榦穗敲持要令脫耒聲互應答喜藉微風發  
胼手那辭勞震耳何嫌聒遺稊可供爨猶省拾楮

簸揚

農事合家作乳子背衆前大姑待把穗簸出珠顆圓  
抱哺而併倨赴時彼何專惟是質有禮熙熙樂逢年

礪

初揚藉簸風再礪資石齒有如琢磨功斐然乃君子  
爲倉欲潔好爲廩欲高峙珍重語兒孫寧容輕視此

春碓

五羊未遇時身世輕一葉豈知功業成  
感深相杵答  
旣春亦旣碓玉粒期甘滑厭彼機心轉  
寧吾胼足謁

簾

老翁坐風簷咄咄課細簾將以輸天庾  
笏三豈謂過  
粗糝詎狼戾得飽雞豚賀癡孫莫喚嫗  
嫗孱正酣臥  
入倉

簾簾旣備功嘉穀應登庾秋濕防黴  
苑高塏爲廊廡

我屬望甘霖愁心日旁午展此冀紓懷終風又彭怒

紀事

職方掌馬政今古稍異制上駟育天閑驪黃六飛備  
司馬設京館惟用供驛致芻秣費良厚厯減十三四  
其數猶八百圉官或竊饋馬食人食之肆兀半僵斃  
存者僅三百率弗可乘騎夏卿覺其然白簡付吏議  
剔奸爾已能務實我尤切叶一再減何妨莫擬過苛  
細三百茲僅存不聞郵政廢奚獨飽貪囊不爲節用

計乃有作難者亦頗中去聲時勢賴馬食者多減馬人  
將逮貢禹疏曾讀謂其言精詣小試已扞格今豈非  
昔世匪慕漢文爲探蹟聊紀事

養正四詠

書無逸於勤政殿屏風時自警也更效長康法  
爲養正四圖於下六十條內足師法者多以限  
於屏數且擇其最精云

寢門視膳

寢門虔問視日三念在茲食察寒煖節體詢安否宜  
大舜慕五十孟氏稱孩提西伯仁人哉由來因此推  
立愛千秋法錫類百王基

丹書受戒

歸放馬牛已勤思天保定齋三受丹書端冕東面聽  
軒頊道無奇曰敬勝義勝怵惕銘席端如臨師保命  
君鑑詎殊途外王本內聖

弓矢喻政

弓矢少所習自謂能盡妙叶得弓漫稱良弓工曰非  
好於弓猶失之況於理之貌更宿命京官政教勤探  
討絜矩勵實行文皇信有道

樂受格言

洛中有逸士徵聘來殿庭鬚鬢已皤然何異角里生  
兩言實得要敬佩書諸屏迂儒陳禮樂方士談蓬瀛  
淺言至理賅不愧學行名

雜言

黃蘗其味苦咀嚼生微甘白蜜滿口甜微辛其中潛  
元冰含陽溫烈火藏寒炎翼者兩其足齒者角難兼  
高明鬼闕室天道每益謙百慮或一失芻蕘有理談

讀平原君傳

公子稱最賢食客至數千高樓臨民家躡者行槃跚  
美人忽臨見倩兮巧破顏明日躡者至謁君抗辭前  
願得笑者頭君哂未許焉舍人稍引去怪問始知然  
愛色而賤士誰肯相周旋爰斬美人頭謝罪自造門

門下乃復來相傾  
文歇間卒得穎脫  
力定從自楚還  
一笑知何人  
其事況經年  
美人誠然乎  
胡乃致客還  
更公每好奇  
於斯見一斑



皇清文頴續編卷首十四

高宗純皇帝聖製詩

五言古詩

覽性理書

常聞善問人譬如攻堅木必先其易者後乃及節目  
讀書或異此窮理戒馳逐格物一以貫精粗無不燭  
聖道豈殊途知行要並勗何事立門庭操戈判朱陸

題王儉撰褚淵碑文

資父以事君本天經地義彥回以孝稱胡甘二姓事  
可憐石頭城口碑有公議仲寶樹綽楔乃復騰文字  
光輔五君同寅亮二代逮將爲直筆書抑爲同惡濟  
昭明但選文取裁失節制

習字

間日視閣章山莊有清暇有暇亦何爲讀書及習射  
書亦六藝一自古重墨稼裴几鋪玉版嘉蔭就松架  
繕性歸平易變體祛奇詫舉首瞻

奎文當年此消夏

松子

窩集惟木海粵有千年松拔地數百尺始見枝蓬蓬  
下視萬種樹如祖臨兒童間氣孕靈實層出寶塔重  
俗呼其殼  
爲松塔云鱗砌纈纈珠顆含其中碧幢及翠蓋瑞

湧巔芙蓉喬松遇已艱結子百一逢因知希世珍不  
與凡卉同玉角重堂卷甘腴香氣濃可用資學仙詎  
惟能療風舊聞取之法剝根僵鐵龍藥房得一二誰

惜山將空圖便事暴殄未可聽其蒙命茲緣木求禁  
彼斤斧攻非關惻隱物惟懷造化功

千尺雪

遊山乘好春言旋未卓午山莊咫尺近依牆構軒宇  
下馬每憩茲三楹清爾許迴落千尺雪平貯一泓渚  
松濤泛上簷峽籟翻底礎或爲勇士夫慷慨悲歌舉  
或爲兒女子囁嚅相爾汝或爲金石堅戛之鳳來舞  
或爲絲管脆奏之行雲佇竹爐亦在旁汲取活火煮

無色聲香味誰能信此語

千相寺

東谷寺較少千相乃稱絕山莊喜不遙雲逕幾曲折  
亂石穿磊磊幽泉度泱泱花宮忽已到淨土真堪悅  
調御祇獨尊千相名誰設昔聞有古德於此棲巖穴  
木石爲寢處虎豹相玩狎一朝遇良契枯禪悟指月  
把臂送出谷落淚殷勤別旣云物我空此又如何說  
憇山遇隱者  
事見盤山志

萬松寺

昔來見松枯惜謂松遭劫今來見松苑幽懷爲松悅  
惜悅皆儻然裁成亦有說蒼松本壽客何致生意滅  
徘徊思其故叅以所聞閱寺僧圖目前繞樹剝膚甲  
取以供炊爨裸立何能活因之刷材鬻牟利誠不拙  
吁哉貞幹質枉使遇摧折申命禁所爲毋俾生機泄  
枯枝及落葉儘可煨櫓拙留松爲山姿青雲常護法  
亦可招客來施檀仍爾業此禁不數月守令如守偈

蒼松果迴綠重見蔥蒨列百丈擎翠龍森森鬱岬嶸  
苑枯松不知悅惜吾何切晰理及輔相願因通理物

讀季布傳

季布無二諾豈非任俠士受辱不爲羞猶曰欲信

平聲

已冒頓遺漢書謾言輕呂雉以有易所無主辱臣誼  
死高后亦發怒議欲誅其使樊噲願橫行十萬兵足  
矣布曰噲可斬平城禍堪指惡言不足怒美言不足  
喜卑辭奉車駟無罪幸赦耳一時患固弭萬古羞難

沈史遷乃戇之大失遵養旨

歡喜園二首

精舍隣竺宇名以歡喜園德水正臨砌禪枝亦繞門  
幡影動皆靜磬聲寂不喧偶來寄清暢把筆還忘言  
佛誠忘物者何以云慈悲物物皆得所乃其歡喜時  
我有臨民責其義應若斯惟其後樂切是以先憂滋  
憑窗攬西成歡喜暫在茲

勵志詩



命戶部會計雍正十三年間蠲賑江南銀百四十餘萬乾隆元年至十八年蠲賑江南銀二千四百九十餘萬米稱是有以施博後難爲繼爲言者詩以勵志

皇考勤民瘼明綸戒大吏災傷孰敢隱蠲賑廣儲備江南稱水鄉霖潦每易致十三年之間百四十萬賜試較古救災有過無不至眇予奉

家法屯膏懼非義十八年所賑過先二十倍災多賑

以多調幕惟增愧或云民習驕或云官示惠胥非我所知所知痼瘵意損上斯益下卦爻義昭示所全良必衆永言勵吾志

頻聞

頻聞西師信脅從勦撫多渠魁就獲否遲待音如何華鐙縱酬節萬里懷枕戈情知天助順衆憤惟么麼塗炭其鄂拓契綸其綽羅饑鷹忽來投恩顧曾無過封狼終竄去曾匪嚴辭訶本意攘四部事逆理則那

恃計計今窮奚賴三窟窠獨厯王臣勞浹歲契濶歌  
更念歸化人游牧廢寢訛佇俟紅旗遞集賽馳明駝  
雪嶺兵氣銷瀚海春風和

讀左傳

荀吳伐鮮虞鉅鹿圍其鼓或請以城叛穆子拒弗許  
好惡苟弗愆民皆知適所弗賞爲失信賞惡去聲則何

取欲城而邇奸所喪多無補鼓人殺叛人繕備更守  
禦圍之又三月請降仍致語民猶有食色姑修而城

拒食竭告力盡取之方振旅不納叛誠當

去聲

不撫降

何處信如待食竭管命豈弗苦何云不戮一謬託怠

弗賈子魚誚宋襄致志鼓儛可

叶

設其愛二毛則如

服於楚比義可知非何事邱明敘浮夸真定評吾聞  
之韓愈

### 讀淮西碑

思縣唐貝州高唐亦博郡我讀淮西碑遙想建藩鎮  
稂莠滋不除恬嬉誰過問憲宗大振作羣臣始懾震

致魏博貝襄從志皆恭順曰武不可究少息輯威忿  
元濟犯東都萬口如一論因撫而有之無事休生變  
帝曰有臣同命師分道進度愬各努力獲醜兼執訊  
用是淮蔡平鴻文勒碑峻譬臧獲背主操戈戶庭近  
縛之不爲功縱之徒致吝益因知政頽安得謂武奮

曠觀齋

表裏湖山間是處獨疎朗虛齋適構成廓然涵萬象  
圖書鑒古今草木樂長養祛彼紅塵緣結此青霞想

三才圖會卷之四  
名臣一  
十  
鳶魚自豈知化機一俯仰

界湖樓

金河高長河玉泉高倍蓰設非次第蓄一瀉無餘矣  
裂帛本有湖方塘數畝耳接上擴充之此湖殊渺瀰  
界渠築橫樓倚影翻窗紙實得空澄趣詎止烟波美  
面面闢溪田萬頃綠含綺隨時祝有年是吾乃所以

雙烈詩

雙烈詩者例雙忠詩而作也昔駐藏都統傅清

左都御史拉布敦誅叛臣朱爾墨特納木札爾  
以人少力微二臣死事然究能鋤元兇而安絕  
域故臨奠建祠並有雙忠之詩以揚其勲去歲  
命定北將軍班第議政大臣鄂容安駐伊犁時  
二臣旣奏阿睦爾撒納有反志朕命便宜從事  
庶幾消患未然乃二臣觀望疑慮以致免脫而  
賊黨反得結連赴約襲我軍營二臣力不能敵  
捐軀沙場猶之死王事也一以勇決建績一以

徘徊償事然而臨難致命奮不顧身有足哀者  
今大兵旣靖伊犁逆賊窮蹙逃竄不日獻俘二  
臣靈輦至京之日朕亦親臨醮奠並成是作雙  
烈云者蓋不如雙忠之盡善矣

昔有傅介子手斬樓蘭頭通權建殊績芳名播千秋  
況乎統三軍旣悉彼逆酋一武夫之力何事仍夷猶  
逡巡大軍徹偏師五百留彼梟有密約入覲中逗遛  
八月廿五日三處共一謀阿睦爾撒納來阿爾台師



將合其部衆挈妻孥以逃叶是則預有旨其妻孥盡

收厥阿巴噶斯斷我軍書郵克什木巴朗伊犁逞劫

偷兩路如期發猖狂肆叫詼叶蜂屯更蟻雜不可爬

與梳叶二臣知不敵全軍將內投而彼截歸路加以

聚虬蜉巴朗謀致辭權假爲我速徐當備馬馳送之

返皇州二臣怒唾罵天朝無此媮効死視如歸背義

生肯求奮旅更前進氣髮衝兜鍪終知事不濟畢命

飲屬鏐叶問罪重整師豈辭雪載途叶旋復定伊犁

脅從寬厥尤一二助惡者繫虜皆虔劉渠魁竄異域  
王師奮遐搜亦聞哈薩克縛獻深同讐命求二臣骨  
靈輿返首邱臨奠例雙忠惜哉淚湧流初若聽我言  
寧有今日不忠於國有濟烈惟已不渝叶究匪貪生  
比使我悲心悠朱門歌舞輩青史文章儔我豈爲彼  
哉長歌旌乃休

禡木特詩

厄魯禡木特本其舊宰桑領衆扎哈沁所職守邊疆

昔奉其主命侵掠我駝羊

事在雍正八年

西鄙衆軍士羣知

勇異常前歲三策凌

都爾伯特策凌策凌烏巴什策凌孟克彼中謂之三策凌嚮

化入相望禡木特親追闌進我卡塘弗及乃退出未

敢肆猖狂維時予有命邊臣爾何恒隘界等無人不

擒汝罪當邊臣聞乃懼誘致奏九閫予謂不明討計

誘失斟量命釋禡木特薄責勵戎行阿睦爾撒納彼

中久披猖禡木特與戰屢勝兵威揚撒納大窮蹙始

決親來降侵尋彼大亂我師壓境強禡木特亦歸優

脊加冠裳進兵命與議造膝陳言良撤納今雖順其  
心乃豺狼不可命彼往往必爲厲殃予云不逆詐遣  
彼亦何妨使其顯背叛正罪往斧吭亡何定伊犁亡  
何逆蹟彰譎賊謀夙定煽亂爲鴟張禡木特力寡勁  
敵歸途搪猶手刃三賊力盡馬亦僵被擒見撤納不  
屈氣更昂逆賊責之云衛拉天各方汝何心嚮內同  
類而相戕禡木特唾之理義人之綱舊主嗣早絕  
謂噶爾丹策凌匪我獨恕忘大君惟討逆信義昭煌煌擒我復

捨之旣歸恩遇滂於恒尚應報起死可弗償嚮內非  
獨我汝先沐寵光一死我弗懼駢誅汝立亡逆賊慙  
無言絞縊厥命傷伊犁重底定遊魂走踉蹌脅從以  
次擒生致明憲章問以禡木特畢知顛末詳烈士何  
處無未可分域鄉錄實彙括辭千載流聲芳

理趣

目力所見處耳聞不能到隔窗人語聞耳力目弗照  
聞性近而沈外物弗能搖見性遠而浮一指當前拗

皇朝三才集卷之二  
名臣一  
二  
曰見不如聞聞遠知何調曰聞不如見見近蔽空眊  
此訕彼則信理趣符道要

讀史記文帝紀

文帝信云仁清靜以爲治惻隱除肉刑民租每蠲賜  
此已足千古史貴傳正義而何司馬遷博載失精粹  
如云慎夫人衣乃不曳地設誠敦朴儉銅山又何謂  
張武受金錢加賞使心愧瘳惡盡若斯尚廉誰則勵  
觀其任復土母乃有深意慨然歎史難寧云責賢備

再依

皇祖示江南大小諸吏韻

國本重惟民反裘譬負輶有來長民官聽予一言剖  
嗟此澤國區災沴流行久蠲賑惠縱施未覺蘇黔首  
溝壑有向隅奚稱民父母邇來雖轉旋餘糧寧棲畝  
省方爲觀民已隔六載後與我共治者豈非賢太守  
須知足衣食始可言孝友設教法

放勲色養奉

慈壽五言示予志最哉慎毋負

命總河白鍾山巡撫高晉同往會商疏濬荆山  
橋堵築毛城鋪等工詩以示志

去秋河爲災乃在孫家集漫渠未填築遂致洪波吸  
亟命事修防亦得成功立其如已洩波往往淤泥積  
荆山橋下川較昔高數尺微山乃倒漾沛魚今在澤  
黍恐不能種而況蠶收麥疏瀹莫惜費此實目所急  
同時毛城鋪分流減來脈治標出無奈堤成應卽塞



而何值邂逅河臣數經易因循置度外廬鳳復遭厄  
二患均要務展轉增反側瀉者塞其流渟者疏其偏  
往哉相和衷宣防勉奏績詎可惜一勞未敢期永逸  
但望夏田耕稍救民殘息斯則宣力多豈在日扈蹕

閱淮安石隄詩以紀事

射陽古澤國諸水匯入海自從黃奪淮其危乃更倍  
南北咽喉扼城郭不可改初猶患黃灌閭閻無寧載  
皇祖排淪之六巡勞櫓櫓乃得清暢流何必安東委

前明議河者患黃強淮弱竟有欲  
委安東以拯全淮者其說實謬

治河謝未能繩

武厯實每辛未載經斯安又仰

遺楫惟是隄埒城土自較石殆發帑命更築今來工  
早罷田廬資保固蒼赤庶樂愷永言識其詳癸酉事  
心駭

### 遊華山

跋馬度寒山屏秀宛相映天池知不遙由來稱熟徑  
圖經志洗心柱史標養性初入松竹幽遂陟巖巒巨

崎嶇峭嶠間時有飛泉迸鳴鞭豈不便安用山輿乘  
延緣造絕頂諸峯皆下凭脊如有脚來雲自無心競  
小立極遊目已足暢清興行漏報午刻歸路盤煙磴  
精藍禮莊嚴別室憩幽淨

寶翰垂日月寧止書中聖處處仰

昔蹤起愛復起敬

拈花寺

暫乘紫機暇言訪青蓮宇穹窿真穹窿陽山卑爾許

雲棲歷覺路山泉汲法雨春景青帝繪石脂赤松取  
遂造古道場信是出塵所太湖當我胸雲煙與吞吐  
如如者西竺皇皇者東魯此旣未能逮彼又何曾補  
徘徊兩增慙把筆欲忘語買臣乃俗吏往事奚足舉  
降旨迴鑾時取道徐州視河工詩以紀事

南來兩務重視河及觀民表裏實相資河治民始安  
入疆卽念茲疏濬命河臣隨鑾乃細事佇待嘉猷陳  
高堰新隄固淮口如前巡其病不在斯而在徐城濱

渡江以南來閭閻商賈臻麥田及榮花雨潤日暝勻  
目前堪慶慰額手天地仁但念彼遠鄉寧無歎邇迤  
膏澤以時施衽席期登均昨者接奏牘果道於河身  
先事不預防恐致危城垣一自石林溢南北側注頻  
中泓力反弱刷沙以爲艱治河雖未習要當相度親  
疇咨集衆思勝於紙上言道路粗修可令速馬上傳  
取足供頓宿勿重勞黎元

罷漁

石湖畧觀魚少觀旋卽罷西湖並弗觀意亦故有在  
彼非出本浦移放由官買其利仍民得畧觀當無礙

叶究以事弗實作歌戒寮案此則湖中物民業各分

宰聞爲去聲備水虞數日禁捕採厥牛未踐田奪之固

無罪長官在愛民此事吾弗解散漢濕撻撻吉林流  
浼浼何漁會未經藉此區區乃罷禁付之民網鬻資  
三倍

登六和塔作

初地詣堅固信心登窳堵二諦此俱融空色本無所  
三明真淨域可以泯今古四天垂寶網落落聞鈴語  
五雲糾扶蓋擁護龍象旅六鼈永負戴萬劫奠江漈  
七寶勝莊嚴如是辨香炷層層標實詮七層皆辛未  
年所題扁額  
厯厯憑證取江山識重巡歡喜生八部颺以細細風  
霏以纖纖雨造極朱欄扶曠覽供仰俯於已可忘憂  
於民那忘苦迴首禮釋迦徒羨曾何補

再遊寒山別墅

靈巖紆罕蹕所爲遊寒山春曉宿雨收千嶂泮輕煙  
遵磴下高峯天平在目前此則姑舍是已悉率戒盤  
過嶺不五里別墅爰至焉截薛屏陡壁逶迤枕平巒  
渟爲半畝池激爲千仞湍隨宜置亭閣面勢抱林泉  
昨去落梅英今來綻牡丹今昨信幻耳來去亦儻然  
凡夫果不凡卽境知人仙中心以藏之句留蒼巖間

遊獅子林

早知獅子林傳自倪高士疑其藏幽谷而宛居鬧市



肯構惜無人久屬他氏矣手蹟藏石渠不亡賴有此  
詎可失目前大吏稱未飾叶未飾乃本然益當尋屐  
齒假山似真山仙凡異尺咫松掛千年藤池貯五湖  
水小亭真一笠矮屋肩可掬緬五百年前良朋此萃  
止澆花供佛鉢淪茗談元髓未擬泉石壽泉石況半  
毀西望寒泉山趙氏遺舊址亭臺乃一新高下煥朱  
紫何幸何不幸誰爲剖其旨似覺凡夫云慙愧雲林  
子

閱河示總督尹繼善副總河嵇璜

皇祖闢清口啟閉因時制高堰障淮東三壩尾閘置  
侵循湖漸寬頗有弗容勢辛未親相度因命增築二

其三勢實危乃得開信智

高堰舊設三壩洪湖資以蓄洩伏秋湖漲至弗能容

辛未南巡閱河命增築其二與三壩而五以仁義禮  
智信爲次遞相宣洩智信二壩非漲極弗得輒啟

多洩堰則固高寶潦必暨其間亘運河諸壩復鱗次  
車邏及天然昔人具深意不得已乃宣宣欲有次第  
而爲下河者閉壩堅持議一再偶獲幸未可頻嘗試

所以癸酉秋上下咸被沴其心可矜諒其智誠愚昧  
設云鑒其轍保隄則了事開壩孰不能災傷將歲逮  
審度權節通時刻謹消息叶五言示大端推行慎所  
自

閱高堰工有作

癸酉秋之月沴氣行江南濁黃潦日增清淮漲復添  
清口不能暢五壩尾閘渰而何膠柱者前議持愈嚴  
天然壩弗啟爲慮下河漸究之乃大潰匪愛害倍兼

高寶危城郭興鹽壤閭閻上下兩俱敗何有修防諳  
其時河復決奪溜渾波淹不亟事堵築將慮洪澤占

叶

岌岌數丈堰水連堰面涵億萬淮揚民殆哉奚忍

談立命重臣往分任各勉擔菱礎莫惜費齊鄭助料  
僉其冬乃合龍同日達奏函善後慎在茲滲漏可視  
凡培高斷山骨取固灌米泔因工賑災餘庶民來畚  
杓閭歲績乃奏緩急庶可謐

叶

崇墉茲臨視咨度停

巡驂終無永逸策忸怩惟益慙

題李唐江山小景卷

卷得在衆前卷題落衆後詎因遜別圖理趣聽茲剖  
如對六經士那易開談口欲罷嘆弗能恰值神來候  
叶文豈待加點興到吟筆走原是畫中靈流露借吾

手江非岷卽浙山爲辰抑酉思翁題小景我謂無不  
有鴻濛孕決漭緬邈鬱縈糾瑤林已正虎霞嶠復蚺  
螭或爲壯士怒相持爭勝負或爲比丘禪空色都不  
受或青若出藍或赤若中酒或艷若淑姬或蒼若駘

叟或如劍出匣徐聽泉聲吼或如鏡開奩萬象當前  
取雲閣倥侗棲丹竈庚申守滄波掛布帆或是徐福  
否津逮大將軍畫苑誰出右蕭馬望後塵奚數黃子

久宜乎畫禪翁磬折驚瓊玖武林金屋塵楚弓楚還

扣荆溪隣豪攸轉眼嗟豐蔀

數語見卷中思翁及程正揆跋語

滄桑

閱幾番呵護誠非偶一例畫禪室雪溪相侶友

王維雪溪

小幀先入石渠寶笈以曾經思翁收藏題識因貯畫禪室中與此卷可稱雙璧

香光亦知乎

墨華苑不朽信哉東坡言安得如汝壽

所過示總督尹繼善巡撫愛必達

所過沮洳鄉民艱觸目是入疆覘田野大都荒蕪矣  
高地縱種麥或冀半收耳低地麥復勞青黃將安恃  
翻犁播禾黍復苦無種子官借雖有例吏胥獎無已  
罪固孔距心吾豈徒責已方伯曰隨鑾爾我同見此  
設更無實政責又將誰委方面建有司如臂之使指  
其遍歷窮鄉民瘼周詳視開倉貸穀種加賑賑流徙  
惠必使遍霑仍防蠹役技勗哉各盡心庶俾瘡痍起

戲馬臺用謝靈運詩韻

謝客昔攬勝摘藻蜚白雪逸志託邱園  
皜皜秋陽潔西來爲籌河彭城此駐節  
導浚無良方俾又資賢哲旋顧災餘民  
食乏衣並缺八珍爲弗甘寧能暢遊悅  
雲龍有蘇蹟秀色城頭列途便臺頭寺  
卽戲馬古臺也清詞記一闕放鶴已憩  
驂戲馬慢停轍寄言賡佳作伊人所懷  
別汲古緬心藏撫今慚治劣

登玉符最高峯得四百字



春巡氣尙寒有興未登眺清和茲返轡日長況早到  
宇宙最奇處空過山靈譙設如逢炎暄揮汗亦何要  
時景值佳會況鮮幾務告邂逅不可失一暢智仁樂  
園北啟便門不必命旌纛肩輿陟崇椒林鳥爲前導  
摧峩羅疏峯威紆列層嶠陡壁若無路一縷穿林徼  
或如田見龍或如霧隱豹或雄以猙獰或深以窅窔  
或秀若丹青或壯若廊廟樹抱石爲胎泉飛峽成調  
山花霏細芳山禽遞幽噪歷歷所攬結朗朗開懷抱

舍輿還進步何藉筇屐趨初至半室巖厓屢似棚窰

方牀儼維摩不著天花落

叶

爲想詩僧逸頓息塵緣

鬧躡險捫煙蘿洞有白雲號虜寸一脈起澤應三農

禱證盟功德頂調御真古貌巢鶴最高處胎仙苑可

召應接乃無暇奇觀供四照南瞻日觀峯是我昨所

造北睇鵲華翠雲中辨隱約其東朗公近疑聽錫聲

標惟西乃豁開來路盤崖隩已覺鮮其匹便欲觀其

竅設匪片時勞安識無窮妙蒼然日色暮歸路尋禱

峭憶昔可公輩別傳西竺教想亦巢許流林泉寄笑  
傲侵尋事莊嚴逐末吁可笑其師若有知弗許頭應  
掉有爲法終幻成壞像相詔猶然冀施檀云有福田  
報松塢坐靜觀萬緣信誰覺忘物我未能吟懷且推  
敲

免河南夏邑等四縣積欠隳括其事成詩

巡省匪遊觀民瘼咨處處春月往南時舊臣畢觀御  
家屏彭寶豫人問以稼穡故奏稱數載勞勩賑皆未

遇是時彼方伯

圖爾炳阿

迎鑾正隨路同宣近前席詳告

聽莫誤州縣或欺爾爾莫欺黎庶黎庶且勿欺當前

可迴護挈彼往細勘改過要應速

叶

罪汝亦豈難而

予更有慮鄉紳汝治下聽彼罪汝遽此風頗有關所

以姑寬恕隔月撫臣報履畝親相度

叶

米貴則誠然

蓋緣販糶去只可言借貸未可言賑務聞之爲悚然

誠未解吾憐特命賑一月稍救溝壑赴迴鑾至彭城

乃有道旁謠謂鮮受實惠至今困沮洳因思可使由

聖語有精趣加賑反告災毋乃希恩屢復忖頗有人

一往其過怙

叶

是亦不難辨彭城多瘠苦

叶

隨來諸

部員其狀盡親覩

叶

遴往四縣察與徐同異著旬日

觀保迴備言民痛勦與徐頗無二而苦無恩佈吁嘻

有是哉是不宜再顧方伯及方面爾皆爲民牧

叶

我

無靳惠心而胡諱災固罷斥示重懲更簡賢才付年

來愛民意寧有未盡喻猶然殃我民咄哉益知懼

### 落葉松

松有落葉者乃在興安北其山夏積雪風勁善蕩滌  
是木性宜寒翠雲盤巔劣而頗羞獨樹與衆同凋寂  
崖口向已無關內何能得我命帶根移培平土固密  
旣因順木天遂如轉地力奇峯詭石側森森助景色  
材豈限於域由來繫培植

寓言

四足胎而生兩足卵而育間亦有相反大同而小獨  
解一羽者孚以長上聲外白其中黃造物有神權自然含

陰陽二解 鷺鳴與埭雞六畜本一例而何巧拙殊伊誰

令愚智三解 雞巧善翼卵鷺鳴每不能人審知其然果

羸格物情四解 持將鷺鳴卵雜置雞卵內牝雞乃不猜

一一為撫字五解 啄殼忽成形顧復多慈情咬藻入水

去雞悵非已生六解 鷺鳴豈真拙藏拙他代勞鴻雁與

鳩鵲抱殼禿翰毛七解 覽物得奇會咄哉彼癡雞翼其

白公勝寧非汝子西八解

泛月

池塘暑雨過鴉背斜陽翻蘭舟宜泛月水風爽且寒  
是時恰望夜圓魄出東山素輝流入懷可寤不可言  
絲管厭繁會山水尋清歡清歡未云已馳情忽萬里  
三軍枕雪戈一輪應共此怛然命返舟露布佇報喜

五更

五更軍書至云速六百里宵衣急披閱乃知報捷喜  
呢嗎已俘獲並繫其妻子去歲重猖獗禍魁實曰此  
札努噶爾卜倡和如魚水執魁訊厥蹤云亦就拘矣



乃因彼中亂操戈同室裏達瓦及渾齊

二台吉名縛獻贖

罪已先是我北軍早擒巴雅爾亂首大半殲所餘惟  
二耳哈薩克錫拉組頸期可指阿睦爾撒納喙息尚  
逃死斯實魍魎渠亦失三窟恃佇待白練牽絕域兵  
革弭

再詠側理紙

南巡獲陟釐兩幅珍瓊玖錦囊藏其二說項剏吾口  
西清有典司檢點所弄守五番裏時對謂是束置久

誰知爲海苔徒觀麤且厚恐不宜墨卿未敢供几右  
新獲與茲同呈覽聽去取撫掌囁然笑天府何不有  
或又當面失笑藉不脛走抑且瞿然懼將毋人似否

難易辭

以小制大易黃腰啖虎心以大制小難雄獅懼蝨侵  
以柔克剛易餘甘勝黃金以剛克柔難齒壞舌悄悄  
以石投水易淺言旋復深以水投石難白公空進箴  
以黑染白易墨子悲不禁以白染黑難枉尺而直尋

以已從人易轉圜古所欽以人從已難凜乎朽索臨

西師

西師厯四載王臣久于役誰無室家心而能忘契濶  
始緣趁機動操刀乃別割終以阻遠艱舉甚忌屢易  
欲罷又未能永言誌顛末

皇祖征朔漠卽此厄魯特三番整六師狼羣始窘迫  
策妄退守巢于以延喙息取馘索賊子惟命無敢逆  
厥後漸滋饒遂復刼西域終康熙年間蓋未止兵革

皇考闡

前猷思一勞永逸兩路命大舉帑藏非所惜究因時  
弗輟勝敗互軒輊曰予守

成訓罷兵事安戢稔知賊所恃其長有二術一曰激  
我怒勞我衆遠出彼乃邀近功坐絀我物力一曰窺  
我邊列喉疲戍卒戍久心或懈彼乃逞陵軼知然明  
告彼以主待其客遠兵旣罷征遠戍亦罷撥近邊汝  
或伺汝遠勞竭蹶噶爾丹策凌聞言乃計詘得失故

曉然求和使來亟來亦弗之拒厚往示恩澤如是終

彼身無事皆寧謐其子曰阿占

即策妄多爾濟那木扎爾之乳名暴

虐莫可詰用是失衆心相延爲篡奪喇嘛達爾濟戕

彼位自襲達瓦齊攘之計蓋由撒納綽羅斯汗族達

瓦齊一脈阿睦爾撒納輝特別枝葉時慮衆鮮從以

此綴旒設終不忘伊犁煽亂事狡譎達瓦齊弗甘兵

連禍相結惟時三策凌避禍來投闕撒納旋亦歸寵

遇厠班列孰籌如許衆雜居喀爾喀如狼入羊羣幾

不遭陞嚙就其力請師毋寧授之鉞國家全盛時出  
帑儲胥挈曾弗加賦徭更未廢賑恤八旗及索倫勁  
旅多英傑其心盡忠篤其技善撤振那如杜甫詩慘  
惻新婚別乙亥我出師一矢會未發五月大功成庶  
以慰

前烈而何狼子心飽揚去飄瞥留語啖衆狙倡亂動  
戈戟致我二臣捐驛路肆唐突羣言益蜩螗無怪懦  
者怯欲棄巴里坤堅志斥其說整師重討叛所向復

無敵一二畏首尾乃致賊免脫申命事窮追大宛搜  
三窟於詐應以直殘喘命得乞宰桑勒王者見此笑  
以竊遂生輕我心旋師反又忽計賺我和起奮勇沙  
場沒兆惠全師還則予命往接丁丑重問罪值彼互  
殘殺因緣撒納歸遇我竄倉猝富德躡其後大宛徠  
汗血稱臣許捕寇寇更逃羅刹或曰不必追或曰不  
必索或曰捐伊犁築室謀紛汨北荒守和議冥誅致  
賊骨伊犁倡亂流大半就擒訖初議衆建侯爲撫四

衛拉二十一昂吉公屬掄閱閱是予奉

天道好生體

造物詎知彼孽深厯世不可活以其狙詐類誠如向  
所畫每歲費參養終亦背恩蔑是傷我脂膏而育彼  
羽翼不如反之速掃蕩今將潔猊猊肆惡流三氏淪  
亡歇餘都爾伯特始終守臣節所以至今存耕牧安  
職殖其廿一宰桑非誅卽病歿不善降百殃此理愈  
昭晰謂禍乃成福致得每於失幸以免衆議孰非



鴻佑錫設使司事者惟明更勇決萬全盡美善詎有  
小差跌都大承平久軍旅誰經歷益因警宴安求全  
肯過刻先是花門類雜種曰回鶻久屬準噶爾供役  
納稅秭羈縻其和卓籠絡其臣妾我師定伊犁乃得  
釋縲紲我將縱之歸撫衆許朝謁肉骨生死恩感應  
久不輟報德乃以怨轉面凶謀黷我將所遣使百人  
遇害劇是皆奉上命守義遭梟兀苟不報其讐何以  
勵忠赤厄魯今蕩平回部餘波蕞蕁以守堅城未可

一時拔賈勇誠易登傷衆非所悅中夜披軍書萬里  
遙籌策窮荒信安用弦上矢難遏志因繼

兩朝變豈防一切

蒼靈賴有成浮論寧祛惑開邊竟無已自問多慙德  
但思文子言解嘲守弗諄

阿克蘇城回衆投降詩以紀事

回衆築城居取之原屬易庫車其東戶防守所特備  
徒以將無能久困致自棄先是已兩勝兵威亦云熾

雜種況風怯失城更恇悸是宜鼓衆前先聲圖成事  
而何待益兵稍進復停轡割穀資兵糧前途穀滿地  
不過藉口食遂其遷延計夷考回所據大城原有四  
曰葉爾奇木哈什哈爾暨阿克蘇烏什其餘率小類  
阿克蘇今歸實斷其左臂故緣彼城中伯克乃新置  
霍集占心腹強從非衆意今聞被創敗倒戈更相拒  
叶戕害其用人獻城降遣使此又宜速赴河上逍遙  
寘是謂棄

天祐作孽乃由自易帥明憲章靖遠佈恩惠殲渠赦  
脅從敷化逮闇昧劬哉勉運籌隨若冀

明賜

我軍

我軍取烏什酋長款復獻元戎乘良機率衆直前進  
其奈隆冬時枯草經蹂躪以此馬不肥奚堪供斫陣  
況臨彼巢穴螳臂孤注奮借一誘我軍萬騎逞驅趁  
我師纔千餘鼓勇無退寸橋圯度四百忠義人爭勸

殺賊至千餘矢盡接短刃涉淖退保營相持城下頗  
壯士達七人星馳兩致信舒赫德留守諸回靜以鎮  
羽檄催後師繼進期颶迅畢齊阿克蘇赴援雪深恨  
夷考兵興來曾無遭挫勒此番客主殊不幸致事償  
兆惠稱輕敵請罪誠不吝此非退縮比誰逆料利鈍  
終能寡勝衆允由効忠藎奚忍更加罪褒嘉章服晉  
諸臣諸軍士行賞以功論晝夜促後軍直前金鼓振  
欲藉士敵愾仰冀

天助順捷音共春來平回鴻續建

我師

我師萬里外馬力實難繼況深入賊巢主客勢誠異  
以此被所圍固守鼓衆氣豈忍罪輕進惟獎勤王事  
再三督援師速進以接濟亦不待督責敵愾人同勵  
屈指數<sup>上聲</sup>居諸兵應臨彼地爭勝在俯仰所關信非

細中夜不安寢亟盼佳音至忽傳驛致章秉燭披衣  
視<sup>叶</sup>塵戰五日夜斬將搴旗幟副將軍富德參贊及

軍士<sup>叶</sup>同心成巨功殲賊數千騎已近將軍營通信

卒遣四頭狗百計攻官軍一意備以此厯三月無恙  
皆寧謐相商夾擊策一舉期功遂四月寤寐縈今朝  
始慶慰殷心念衆勞額手感

天賜佇待捷音馳國朝威遠被

鸚鵡

鸚鵡雖能言所言自不知清晨對籠語巧舌能效爲  
一解張華教鴈鸛何忠信寄信審然乃鳥妖事不可爲

訓二雀房飼養熟習慣聽數言背籠乃語他誠恐無

端傳三解甲乙二內侍甲癡乙者黠鸚見甲者馴見乙

鳴戛戛四解甲爲鸚爬搔展翅意若喜有時眠掌上毆

之亦弗起五解乙持果實來漫餌實相撩鸚亦伺其怠

利嘴噍如鵬六解因悟昌黎言小黠乃大癡智固不可

逞物固不可欺七解卽事摘藻詞物各具性靈中孚豚

魚吉可以詮義經八解

軍書



軍書清曉到兩回城已定賦役及建置惟將軍所令  
逋逃雖有挈捨而來相迎詢以所去方乃無可投境  
叶邏騎遮其前大軍逐以競此舉或成禽載戢載橐  
詠佳兵詎得已討逆惟義勝藉衆集大勲盟獨欽  
天命

固濟爾巴圖魯璦綽爾圖畫節詩

璦綽爾圖者索倫侍衛員曾以血戰功因賜號旌賢  
固濟爾何謂敢勇能摧堅亦云其勇耳大節乃炳然

兆惠定回城驛章一一宣云有瑪穆特被回擄去年  
其人厄魯特隨軍廝役焉將軍遣偵騎彼亦隨往旃  
忽被賊回遮衆寡敵實難矢盡守空屋奮突揮以拳  
莫寧察戰沒岱屯命亦捐璫綽爾圖在傷重飲劍艱  
猝被生縛去至霍集占前卓立唾賊罵裂背髮衝冠  
巴圖魯侍衛豈懼爾狂狴天兵今少至數萬繼進連  
以千敵爾萬汝滅踵不旋霍集占乃怒恃刀向頸剗  
其達什策凌同時遭繫牽霍集占忿詈爾厄魯特人

叶  
唇齒應相依何受中國官鐵鈎鈎四肢其死最可  
憐是皆所親見飾語敢取愆徒以無足數旦夕命苟  
延渠逃定回城乃復得見天兆惠聞此語旣悅繼涕  
漣悅以我有人涕以已所遣叶據實厯詳陳痛淚不  
忍看心與帥臣同恩加寧惜駢爲齒睢陽張爲舌常  
山顏古有今豈無詩錄其人傳

雙義詩

有序

副將軍富德至葉爾奇木旣定回城痛去歲將

士之沒於王事暴骨沙塲爲之築墳表墓因以  
奏聞蓋隨將軍兆惠力守者固已無恙而旁出  
捉生及在途值賊者猝致捐軀實出逆料時則  
納木扎爾三泰適以奉差而往遇難而殉此雙  
義之詩所由作也夫雙忠戡亂於無形雙烈表  
節於有北今之雙義亦復炳然此皆我八旗世  
臣與國同休戚者在諸人含笑九泉已知世錄  
之必被而朕捫心午夜奚啻手足之如傷用兵

旣非得已盡節豈所樂聞且卽此役而言非生  
擒二酋何以雪我三軍之恨哉然旣建大業寧  
免微疵卽走卒厮養頗切同仇則知我國家豢  
養旗人萬年鞏固之基而非周秦漢唐一興兵  
而天下驛騷怨聲載道者比此又朕所深慶幸  
者夫

雙忠昔集事雙烈能忘身茲作雙義詩其故得細陳  
曰納木扎爾曾贊北路軍奮勇翦逆賊封伯酬其勲

副都統三泰英氣頗超人均御前侍衛素悉厥忠純

兆惠富德輩從戎久効勤欲代俾將母

將軍兆惠富德母俱年高

比歲領軍討賊故特簡二臣往代之

二臣被選掄去歲黑水役

事見前

固

守遣索倫致信愛隆阿權退催後援可支百日間速

進莫逡巡將軍及叅贊輕進徒俱焚當待師並來何

慮狂狙獫爾時二臣者馳驛往軍門過愛隆阿營却

近黑水濱所遣人未遇礮聲前忽聞知賊與我戰聞

戰恥退奔徒攜百餘騎赴義命同捐

叶

凶信驛遞來

痛淚傷心魂使早知拒守退俟熊羆羣同進可樹功  
何致均沉淪卽先至一日合兆惠軍屯亦可旋今歲  
奚煩以身殉叶不前復不後此實若有神富德自和  
闕重至黑水津葉爾奇木降諸事粗處分痛念我將  
土沙場化爲燐黃頭雖不備掩骼權爲墳猿鶴昔屬  
幻邱隴今可循因以此事奏西望揮淚頻豐碑旌墓  
門千秋西海垠捐軀固臣節在爾非所論在予則何  
忍此恨終當伸夷考六人蹟事異心同均與國休戚

共寧止曰蓋臣史筆多訛傳永言傳其真